

Te Heheuraa Api

E ITE IA OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A

I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

No 2

-- FEBUARE 1950 --

MAT. 37.

E PARAU NA TE PERESITENI NO TE EKALESIA

Te vaiiho atu nei au i te hau ia outou, te horoa'tu nei au i ta'u nei hau ia outou, eiaha mai ta te ao i horoa mai, ta'u e horoa'tu nei na outou. Eiaha to outou mau aau ia horuhoru, eiaha atoa e vaiiho ia mata'u ratou. (Ioane 14: 27)

O te reira ia te parau mahanahana tei horoahia mai e te Arii o te Hau i ta'na mau pipi. Oia mau, aita'tu e mea tei hinaaro-mau-hia, e te taata nei, mai te mau haamaitairaa o te hau e te oaoa o te mafatu tei ore i ite i te mata'u. Ua horoahia mai te reira, ia tatou, mai te mea e hinaaro tatou ia riro tatou ei feia rave i te reira.

I te faaho'iraahia mai o te Evanelia, i roto i teie tau tuu-raa hopea ra, ua parau faahou mai te Fatu i te mau parau ta'na i parau pinepine roa i roto i na Faufaa Tahito e te Api atoa hoi, oia hoi, te hoo o te hau e te oaoa ra, o te parau-tia ia. Noa'tura i te reira ite rahi na rahi roa te taata tei mana'o e, e noaa ia ratou te oaoaraa na roto i te peeraa'tu i te tahi mau e'a e atu, area, i teie nei ra ua ite tatou e, aita'tu

e e'a ê atu. Area ra, na roto i to'na paari, ua faatupu o Sātane i te mana'o o te taata, eiaha ratou ia haere na nia i te e'a e noaa mai ai te oaoa ra, e te rave itoitō noa nei oia i ta'na ra ohipa. Aita roa te enemi o te parau-tia e varea ra i te taoto.

Area ra, na roto i to tatou peeraa'tu i te mau haapiiraa i te Fātu, na roto i te ho'iraa'tu ia'na na roto i te tatarahaparaa i ta tatou mau hara, na roto i te raveraa i te mea maitai e tia ia tatou ia farii i te oaoa, te hau e te manuia. Ahiri te taata nei e here nei te tahi i te tahi ra e ore roa ia te inoino-raa tei vai noa i nia i te ao nei.

Te pure nei au ia vai te Varua o te Fātu i roto i to tatou mau mafatu, e i roto atoa hoi i to tatou mau utuafare, e ia noaa atoa te paari ia tatou i te faaafaro i to tatou mau utuafare a vai ai te taime no te reira. Te tiaturi nei au e, e hibi tatou i teie tau ei tau no te faatupuraa i te amuiraa utuafare ra; ia haaputu tatou i ta tatou mau tamarii e ati noa'e tatou a faatia'tu ai i te parau no te Faaora e eaha te auraa mai no te ohipa ta'na i rave no te taata nei, e ia haapii maitai atu ia ratou te faaho'iraahia mai o te Evanelia i teie nei mau mahana hopea nei, ia tai'o i to tatou mau haamaitairaa e ia faaitite, ma te haehaa, i to tatou mauruuru i te Fātu no te mau mea atoa ta'na i rave no tatou—e te mau mea atoa hoi ta'na e hinaaro nei i te rave, mai te mea e haapao maitai tatou e to tatou hoi mau utuafare.

A ora na tatou i te hoê oraraa ia tia ia riro to tatou mau utuafare ei vahi haapûraa no ta tatou mau tamarii tamarahine e ta tatou mau tamarii tamahine, e no te mau taata atoa o te haere mai nei ei mau hoa no tatou. A ani atu ia haapûrahi o te oraraa nei e te ite hoi i te Evanelia; mai te mea e ta tatou i na reira i te matamua, e i roto i to'u nei tiararaa te vini no te Fātu te parau atu nei au e, te hinaaro nei ratou i te reira i teie nei e i te mau mahana atoa i mua ia tatou.

A amui ana'e tatou no te faaiteraa'tu i to tatou mauruuru na roto i te haamaitai. A farii ana'e tatou i te mau maitai no to tatou mau oraraa nei. A vaiiho i te maramarama, e te hau ia anaana i roto ia tatou iho nei ia tia i te mau varua atoa o te farerei mai nei ia tatou ia riro ei mea faufaa a'e. A haamana'o tatou i tei roohia i te ati. Ia riro tatou ei mau feia maitai i roto i to tatou mau feruriraa e ia riro atoa tatou ei mau feia maitatai na roto i te raveraa i ta tatou mau faufaa no te tautururaa i tei roohia i te ati ra.

Mai te mea e titau atu tatou i to tatou Metua i te ao ra na roto i te pure, eiaha tatou ia pee noa'tu i te mau paran faahapa a te taata e te mau mana'o o te maamaa tei parau e, aita e faufaa to te reira mau mea. Ia ite atoa outou i teie, te vai nei, i roto ia outou iho, te mana no te iteraa e, eiaha i teie nei mahana, e a ore râ, i ananahi, eiaha atoa i teie tau, ia ite ra outou, i teie nei e a muri noa'tu, o te Atua ra, o te Atua ihoa ia, e o Iesu ra o te Mesia ia, e e Peropheta mau o Iosepha Semita. E ite tatou i te reira ia haapao tatou i te mau faaueraa a to tatou Metua i te ao ra.

Te mauruuru nei au i te Fatu no te mau haamaitairaa tei noaa mai ia tatou i roto i teie nei tau. Te mauruuru nei au no te mau mea atoa ta tatou e oaoa nei. Te mauruuru nei au ia'na no te mau tane, te mau vahine e te mau tamarii maitatai ta'u e farerei nei e no te faaroo o te feia tei hinaaro ia ite i to'na mau hinaaro no nia ia tatou iho nei, e tei parau, i roto i to ratou mau mafatu e, *E te Metua i te ao ra, a faaite mai i to oe mau hingaaro ia tia ia'u ia tamata i te haapao i ta oe mau faaueraa ra.*

Te ite nei au e te ora ra te Atua. Ua ite au e o Iesu ra o te Mesia mau ia. Ua ite au e, o Iosepha Semita ra, e Peropheta mau oia na te Atua. Aita a'enei au i haama i te faaite i te reira mau parau mau i te mau vahi atoa ta'u i haere ra. Aita roa van i ite i te tumu e haama'i te hoê taata no te mea

ua ite oia i te parau mau e aita hoi te tahi atu taata i ite i te reira, e tei hau roa'tu, ia tae i te parau no te Evanelia, oia hoi, te mana o te Atua no te faaoraraa i te taata.

Te pure nei au ia tia ia tatou ia haamori noa i te Atua no Aberahama, no Isaaka e no Iakoba, na roto i ta'na Tamaiti here ra o Iesu Mesia, ia noaa ia tatou, i te hopea, te hanahana i roto i te basileia tiretiera, ia oti ta tatou mau ohipa no te oraraa pae tino nei.

E i roto i teie tau, e i roto i te mau tau atoa, ia haamaitai mai te Fatu ia tatou atoa na roto i te horoaraa mai i te oraraa maitai, te mau manuiaraa, te mau orama, te paari e te hinaaro ia tavini noa, ma te faaroo rahi, i to tatou Metua i te ra'i ra.

Tihoti Arap:ra Semita.

EDITORIAL

UA RAVE RAHI ANEI TE ATUA?

TE faaroo nei te Feia Mo'a no te Mau Mahana Hopea Nei i te hoê Atua rahi. O oia te Atua, te Metua, ta tatou e pure nei na roto i te i'oa o Iesu Mesia. Ua amuhia ia'na, te Metua, ta'na Tamaiti o Iesu, te Mesia, e te Varua Maitai. Teie nei nau taata taa-maitai tootoru ra, o ratou ia te Atuaraa, te apooraa faatere i te mau ao atoa nei.

No te haapapuraa i te reira ua na ô mai o Birigama Yona e: *Te vai nei te hoê Mana tei hamani i te mau mea atoa no roto mai i te mau materia e vai nei i roto i te mau ra'i ra. Ua horoa mai oia i te huru, te tereraa e te ora i roto i te reira mau materia; ua hamani oia i te mau tiarama rarahi e te mea iti hoi, tei faa'i i te mau ra'i ra; ua faataa oia i to ratou mau tau e ua faataa'toa hoi i to ratou tereraa. Ua faatupu oia i te ora i roto i te reva e i roto hoi i te pape, e ua faa'i hoi*

oia i te mau aivi i te mau mea e nee haere nei e ua hamani oia
 t te taata nei ia riro oia ei faatere i nia a'e i te mau mea atoa
 ta'na i hamani ra. Teie mau ohipa maere rahi nei, e ohipa
 ana'e ia na te Mana Hope te faatere nei i te mau ao atoa ra,
 ta tatou e tiaturi nei e ta tatou e haamori nei.

E ohipa na'na te mau mea atoa e vai nei, e te vai nei ratou
 no to'na ra hanahana e no te maitai o te mau tamarii o te taa-
 ta nei; e ua tuukia te reira mau mea atoa i roto i te rima o te
 taata nei no to'na ra iho maitai, ta'na mau faufau, to'na ne-
 henehe e to'na ra maitai.

Ua tamau noa o Birigama Youne i ta'na parau faaite na
 roto i teie mau parau: Ua tamauhia to tatou nei faaroo i nia
 i te Tamaiti a te Atua, e na roto ia'na ra, i nia i te Metua;
 e ua riro te Varua Maitai ei ve'a no te faataeraa mai i te mau
 parau mau i roto i to tatou nei mau feruriraa, ia faaite mai i
 te tahi atu a mau parau apî ia tatou, ei orometua no te haa-
 pii, aratai e te faatae atu i te mau feruriraa mana'o atoa ra e
 tae noa'tu i te tau ua maitai roa tatou e ua ineine no te haere
 atu i te fare, i te vahi e ite mata ai e e paraparau atu ai i to
 tatou Metua i te ao ra.

"Te faaroo nei tatou e, o te Varua Maitai ra, o te hoê ia
 melo oia no te Torutahi, e a ore râ, no te Atuaraa. Eiaha te
 hoê taata i roto i na taata tootoru ra, e eiaha'toa e toru taata
 i roto i te hoê noa iho ra; area ra, te Metua, te Tamaiti e te
 Varua Maitai, hoê â ia ratou i roto i te ohipa mai na taata
 tootoru tei amuihia to ratou man mafatu i roto i te hoê ohi-
 pa. Ua riro oia ei te hoê o na mea e toru ta tatou e tiaturi
 nei, e teie hoi ta'na ohipa, i te tautururaa i te mau taata tei
 here i te parau mau. Ua faaite au e, ua riro ratou ei hoê, mai
 te mafatu o na taata tootoru i riro ei hoê ra."

Te haapii nei e te faaroo nei hoi te Ekalesia e, e mea taa-
 ê-maitai na taata tootoru i roto i te Torutahi, area râ, ua hoê
 ratou i roto i te mau mea atoa no te pae o te faaroo e no te

ohipa hoi.

E mea papu roa, i to ratou haapaoraa i te ohipa e te opua-
raa ora a te Metua ra, ua faataa-maitai-hia te tufaa ohipa a
teie na taata tootoru ra. Ua faataahia o Iesu no te hamani-
raa i teie nei ao, te tuuraa i te taata i nia iho i te reira, ia
faatupu i te amuiraa mure ore i to te taata varua i to'na ra-
tino na roto i to'na poheraa i nia i te satauro, e ia tae i te
taime ra, ia faaite atu i te Metua i te huru o te tereaaa o te
taata nei, i nia i te ao nei, ia tia ia faatupuhia te hoê haava-
raa parau-tia.

Ua horoahia, i te Varua Maitai, te ohipa rahi i te tauturu-
raa i te taata paruparu i te imiraa i te parau mau no to'na
ra ora. E faaotihia te reira na roto i to'na amuiraa i te mau
taata atoa e vai nei i nia i te fenua nei. Na roto i te reira a-
muiraa e tia ia'na ia faaara mai ia tatou i te hara, ia faaite
mai i te e'a o te parau-tia, te tautururaa i tei here mau i te
evanelia, e ia riro ei ite no te parau mau ia itehia te reira.
No reira, na roto i to te Varua Maitai raveraa, aita te taata
i faarue-otare-noa-hia, e tia noa ra ia'na ia vai noa i mua i te
aro o te Atuaraa.

Na te reira parau heheu, no nia i te huru o te Atuaraa,
faaite e i haapii-papu-mai ia tatou e, te vai nei na Atua too-
toru. I te tahi tau, a aparauhia'i oia e, ua haapii oia e, te
vai nei te mau Atua e rave rahi, e te tahi mau taata faaro-
ore, ua na ô mai te Peropheta ra o Iofepha Semita e, "E
parau vau no nia i te Atua e rave rahi. Ua maiti vau i te
reira parau ei parau tumu no ta'u parauraa. Te hinaaro ma-
au i te faaite atu ua parau vau e, i te mau vahi atoa ta'u i te
parau atu no nia i te Atua, te vai ra te mau Atua e rave rahi
hi. Ua porohia te reira, e te mau taeae, no na matahiti e ha-
ahuru ma pae i te maoro.

"Ua tamau noa vau i te parauraa'tu e, e taata taa-ê-ma-

tai te Atua; o Iesu Mesia ra e taata taa ê oia i te Atua, te Metua; e te Varua Maitai ra, e taata taa ê hoi oia, area râ e Varua noa oia; e teie nei na taata tootoru ra, nau Atua tootoru ra, ua riro mau ia ratou ei mau taata taa-ê-maitai te tahi i te tahi. Ua tano te reira i tei papaihia i roto i te Faufaa Apî, e iuaha! te vai nei to tatou na Atua tootoru, e ua rave rahi ratou; na vai te reira e faahapa mai?

Area râ, i roto i te evanelia i faaho'ihia mai aita te parau ra e atua i faahiti noa hia no te parauraa no nia i te Apooraa rahi faatere o te mau Atua, oia hoi, te Metua, te Tamaiti e te Varua Maitai. Te vai nei, i roto i te ao atoa nei, te mau taata maramarama e rave rahi e ua tae mai te tahi pae o ratou i nia i teie nei fenua. Te reira mau taata, mai te mea ua haapao tamau ratou i te mau ture a te Metua mure ore ra, te haere noa nei ratou i te faito mau o to'na ra huru. E tei haere roa i nia, i roto i te haereraa mure ore i mua, ua parau-atoa-hia ratou e, e Atua. Ua tano-maitai-roa te reira i nia i te haapiiraa tei parau e, e tamarii ana'e tatou na to tatou Atua, te Metua, no reira, hoê â ia to tatou huru, e ua tia ia riro tatou mai ia'na atoa ra i te huru. Ua faaite-papu-hia-mai te reira parau i roto i te hoê heheuraa tei horoahia mai i te Peropheta ra o Iosepha Semita no nia i te hopea mau o te taata.

"No reira, mai tei papaihia ra, e atua ana'e ratou, oia mau, te mau tamarii a te Atua."

E ua na reira-atoa-hia te parau no nia i te feia faaroo ra, "e riro ratou ei atua, no te mea aita to ratou e hopea."

Ua faahiti-faahou-hia te parau no te mau atua e rave rahi i roto i te hoê parau no nia i te mau ture maere rahi, te mau mea e te mau huru o te mau ao atoa ra.

"Mai te au i tei faaotihia i roto i te Apooraa o te mau Atua mure ore ra, e te mau atua êê atu, hou teie nei ao i hama-nihia'i."

Mai te mea te vai nei te mau Atua e rave rahi e mea papu te vai atoa ra te hoê vahi taa-ê maitai i rotopu i te Torutahi Mo'a e te mau feia tei noaa ia ratou te tiaraa atua na roto i ta ratou mau ohipa parau-tia.

Mai te reira haapiiraa tumu i roto i to'na mana'o ua a'o o Birigama Youne i te a'oraa tei faahuru ê hia e te enemi ma te parau e, te haapii nei tatou e, o Adamu te Atua ta tatou e pure nei e ta tatou e haamori nei. Ua apee noa'tu o Birigama Youne i te haapiiraa-papu-maitai a Iosepha Semita tei na ô mai e, ia oti te ohipa a te ao nei, e faaho'i atu te mau upoo no te mau tau tuuraa evanelia i to ratou mana i roto i te rima o Adamu o te faaho'i atu i te reira ia Iesu Mesia tei faatere i te ohipa no te hamaniraa o teie nei ao. Na te reira i tuu ia Adamu, te taata matamua, i mua roa i roto i te nairaa fetii o te taata nei, (maori râ o Iesu Mesia, tei faanahia e te Atua Metua). Ua na ô mai te Peropheta ra o Iosepha Semita:

Ua ani te Metua ia haere mai te mau Varua atoa i mua i to'na ra aro i te taime oia i hamani ai i te taata e ua faataa maitai oia ia ratou. Oia, (o Adamu) tei riro ei upoo e ua faauehia oia ia fanau e ia rahi. Ua horoahia mai te mau taviri, i te matamua roa, ia'na, e na'na i horoa i te reira ia vetahi e a tu. No reira e mea tia roa ia faaite oia i te huru o ta'na haapaoraa i ta'na ohipa, e o ratou ra, e faaite mai ia ratou i te reira ia'na ra.

Tei ia Adamu te mau taviri no te tuuraa parau no te iraa o te mau tau oia hoi, e heheuhia mai te reira, na roto ia'na, mai te haamataraa e tae noa'tu i te Mesia, e mai te Mesia mai â e tae noa'tu i te hopea roa o te mau tau e heheuhia mai ai te mau mea atoa ra.

Oia mau roa, i raro a'e i te Mesia, o Adamu ia te tia mai nei i mua roa i te upooraa mau o te fetii taata nei, e no te reira e haamaitai-mau-hia oia na roto i te horoaraahia te tiaraa Atua no'na ra.

Area râ, i roto i taua a'oraa ra, ua parau mai o Birigama Youne, no nia ia Adamu, o Mihaela oia, te arii melahi, to te Mau Mahana Tahito ra, no reira eita roa e tia i te taata i

mau ia hape atu ia Adamu e te mau melo no te Atuaraa.

E teie te hopea o te pahonoraa i tei papaihia i te haamata-
ma o teie nei parau, Te vai nei te mau Atua e rave rahi.

NO NIA I TO TATOU FARE PURERAA APÎ

Roto Miti, Utaha, i te 10 no Temuare 1950.

Na te mau Orometua, te mau melo no te Ekalesia e te mau Hoa atoa i
roto i te Misioni Tahiti.

E au mau Taeae e au mau Tuahine here,

Na roto i to te ohipa e to te atea amuiraahia aita'tura i tia ia'u ia amui
atu ia outon i roto i te mau ohipa no te tomoraa o to outou Fare Pureraa
e te Fare Orometua hoi, no reira, ma te faatiaraa a te Peresideniraa Mata-
mna te rave nei au i teie nei rata no te faatae atu i ta'u mau parau haa-
manuuru, ta'u mau arueraa e ta'u mau haaamaitairaa. Ua maitihia to ta-
ton taeae Aposetolo o Mataio Cauri rana o Alamu Burton, te hoê o te mau
Peresideni tahito no te Misioni Tahiti, no te mono atu i te Peresideniraa
Matamna i roto i taua raveraa maitai ra.

E haere atu te tumu no te faatiaraa o taua na fare uehenehe ra, e te fe-
ma tei faaati atu i te reira, i muri roa, i roto i te mau ava'e hopea o te ma-
tahiti 1945 a faaite mai ai o Mitiela Peresideni e, e mea tia ia iritihia'tu te
Fare Orometua no te vahi tahito ra e ia alaihia'tu i te pae apatoerau o te
o te Oire, te reira te hoê tufaa fenua tei hau atu i te rahi i te fenua tahito
ra, tei vai i roto i te tufaa o te oire tei hau roa'tu i te maitai no te parahi-
maa no te taata e aita atoa hoi e maniania i reira.

E parau faaite rahi mau â te reira, no te mea, ma te tai'o ore i te faa-
meraa i te vahi tahito, tei riro ei vahi pû no te Ekalesia no na matahiti e
rave rahi. e pan paha e 250.000 tara moni marite.

Ua mauuru roa o Mitiela Peresideni a faaitehia'i oia e, ua maitihia e
na faataahia o Farani Fulmare, raua o Alama Burton, no te haere i Tahiti
na no te tautururaa i roto i te maitiraa i te hoê tufaa fenua apî no te faa-
tiaraa i te fare pureraa apî e te fare Orometua atoa hoi. Ua tano maitai
na teie na taeae no taua ohipa taa-ê-ra, no te mea, noa'tu i to raua aravi-
hi i roto i te ohipa hamaniraa fare, ua rave rahi te matahiti ta raua i parahi
i Tahiti na, e i te Tuamotu atoa hoi, e ua riro hoi raua ei na Peresideni no
te Misioni i mutaa ihora.

Ua faataahia raua i te ava'e no Me 1946 no te maitiraa i te vahi tiaraa o taua fare pureraa nehenehe, e te mau fare atoa hoi, e mea tia roa ia haamaitaihia teie na Peresideni maitai, o te Misioni Tahiti, no to raua paari e te papu maitai o to raua feruriraa.

Ua faataahia te taata ra o Harold Burton, taata hamani hoho'a fare, ia hamani i te mau hoho'a o taua fare ra e ua horoahia'tu, i roto i te rima o Farani Fulmare, te ohipa rahi no te faatereraa i te mau ohipa atoa no te faaotiraa o taua mau fare ra.

E mea iti roa, mai te mea ua vai, to rotopu ia matou tei ite papu i te mau peapea, e te mau fifi rahi, tei farerereihia e Farani Fulmare i roto i to'na faaotiraa i te ohipa tei tuuhia i roto i to'na na rima ra. To'na tapuraraa e to'na hi'oraa i te mau mea atoa tei hinaarohia ra, te hooraa i te reira mau mea e te mau machini, tei faatupu i te mau raveraa ohipa na te pae moana Patifita o America ra, te taraburaa i te pahi no te tieraa mai i te reira, te titauraa i te mau parau faatia no te haponi mai i te reira mau tauihaa, te reira mau mea atoa, e ua hanere atu te mau mea tei ore i faahitihia, tei ravehia hou a haamatahia'i te paturaa o taua na fare ra, ua haapao o Farani Fulmare i te reira, ua hi'opoa oia i te reira e ua faaoti oia i te reira mai te au i ta te hoê taata aravihi mau e tia ia faaoti.

I roto i te haamataraa o te reira mau ohipa e te haponoraa mai i te reira na nia i te mau pahi, ua tauturnhia oia e Alama Burton, o te tae atu i te oro'a tomoraa fare, e ua vai ineine noa oia, i te mau taime atoa. no te tauturu atu ia'na.

Te mau tauihaa tei haponohia'tu, hou te taeraa'tu o Farani Fulmare i Tahiti na, ua haapaohia ia te reira i raro a'e i te faatereraa o Mitia Peresideni. Ua oaoa oia i te raveraa i te ohipa no te titauraa i te parau faatia no te haponi mai i te mau tauihaa, te raveraa i te ohipa e te fare tuania, te hi'opoa-maitai-raa o te reira e tae noa'tu i to ratou afairaahia'tu i nia i te fenua api.

I roto i te reira ohipa ua farii oia i te tautururaa paari o to tatou taeae o Marcel Bonnet e ua tia roa ia haamaitaihia oia no te reira.

E mea tia atoa ia faaite atu tatou i to tatou mauruuru ia Mr. Leonce Brault, te hoê avaota tuiroo no Papeete, e ia Tihoti Ahnne, to tatou Deputy tei mate a'enei, e to'na mau hoa rave ohipa, no to ratou raveraa i te mau ohipa no te hooraa mai i te mau parau tiaraa o te fenua api.

Mai te 8 no te ava'e no Setepa 1947 ua tauturu maitai o Lelani Carver, tei faataahia no te tauturu ia Farani Fulmare, i roto i te paturra i taua na fare ra ma te tuutuu ore e tae noa'tu i to'na hoa, o Teona, tei riro ei hoa paari e te oaoa hoi no'na i roto i taua ohipa ra. Noa'tu i to te tahi pae o matou tuuraa i te mana'o e, e mea tia paha ia ho'i mai i te fanua nei no te

oraraa e te haapiiraa a ta raua mau tamarii, na faaite noa mai raua e, e faaea raua i ô na e tae noa'tu i te otiraa o taua na fare ra. No reira e vai amui noa to raua na i'oa, e ta raua ohipa, i roto i te parau no taua ohipa faahiahia ra.

Te vai atoa ra te tahi mau Orometua, e te tahi atoa mau melo no te Ekalesia tei horoa i te mau mahana, te mau hebedoma e te mau ava'e e rave rahi o to ratou taime, e tei horoa'toa i to ratou puai e to ratou ite, ma te moni ore, no te faaoti-maitai-raa o taua ohipa ra.

E ua maururu atoa matou no te tautururaa tei horoahia mai e Taro Levy, tei mate a'enei, e to'na atoa ra utuafare, e tae noa'tu ia taote Wurfel tei tanturu maitai i te ohipa na roto i to'na haapao-maitai-raa i te oraraa o to tatou mau taata.

Na roto i te mau parau faaite a Mitiela Peresideni, a Farani Peresideni e a Lelani mono Peresideni, ua ite te Peresideniraa Matamua e, ua tauturu-maitai-atoa te mau taata faatere ohipa a te Han e tae noa'tu i te tahi atu mau hoa maitatai no tatou. I te reira mau Tavana, Faatere Oire e te mau Raatira Tuanie, te faatae atu nei te Peresideniraa Matamua i to ratou maururu rahi ia ratou.

Oia mau, ia ratou atoa, te faatae atu nei te Peresideniraa Matamua i to ratou mau aroha, to ratou maururu, e te pure nei ratou ia haamaitaihia outou, ta taitahi, no te mau ohipa tauturu ta outou i rave ra. Eita roa e faatiahia ia mo'e ê atu te hoê ohipa maitai e ia ore ia horoahia mai te utu'a no te reira. Te taata te rave i te reira e haamaitaihia ia oia; e no te reira hurn ohipa e maitai a'e e e oaoa te hoê taata e e haamaitaihia te hoê vahi.

*Eita roa te hoê oraraa e viivii ore i roto i to'na opuaraa
e te puai i roto i to'na mau oraraa,*

*E eita te mau oraraa atoa e hau atu i te viivii ore e te
puai na roto i te reira ravea.*

Te oaoa nei outou na roto i te otiraa e te tomoraa hoi o taua na fare ra, area ia vai noa, i roto i to outou mau mana'o e, noa'tu te nehenehe e te rahi o to'na mau piha, e te mau piha haapiiraa, tei hau atu i te maitai no te ohipa, aita te reira mau fare i riro ei hopea i roto ia raua iho; na riro râ raua ei ravea. Ua patuhia teie nei fare pureraa no te haamoriraa'tu i to tatou Metua i te ao ra, e ua faataahia te mau piha no te haapiiraa'tu i te Evanelia a Iesu Mesia ra. Teie ta tatou ohipa, i teie nei e i muri iho i te oro'a tomoraa, ia haapao maitai outou i te reira mau fare e te fenua tei faaati i te reira, ia va'i mo'a noa te reira e ia ore te reira ia haaviiviihia i te mau ino, ia vai noa te varua o te hau, e i reira e oaoa'i te Varua o te Atua ia parahi i reira e tae noa'tu i te faito e, ia haere mai te hoê taata

“no te faaôô, e parahi oia no te pure atu.” Na roto i to'na faaûrûraa maitai, mai te mea e haere mai te hoê ma te ino i roto i to'na mafatu, ia monohia te reira ino i te hi-naaro maitai; to ratou mau mana'o ino i te feruriraa afaro maitai; to ratou maereraa i te hi'opoa-maitai-raa; to ratou haapao ore i te faaroo e to ratou mau imiraa maitai i te hi-naaro ia haamori. I reira ua faatia ia taua fare ra i te tumu oia i patuhia'i ra, ia horoa oia i te tamahanahanaraa i te feia tei oto, te tiaturiraa e te faaûrûraa i te feia tei roohia e te mau peapea; e i te mau taata atoa, te tomo atu i roto ia'na ra, te ite papu i te haapiiraa papu mau, no te maitai o te huru atuaraa e te tahi atu â mau huru mau o te mau parau tumu no te Evanelia a Iesu Mesia tei faaho'ihia mai. Mai te mea e titau outou i te patururaa o te mau haapiiraa tumu o te Ekalesia, e i ia to outou mau mafatu i te hau e te oaoa no te mea, oia mau, mai ta te Peropheta ra, o Iosepha Semita, i parau ra—*E noaa mai te oaoa mai te mea e maiti tatou i te e'a e tae atu ai i reira, e taua e'a ra o te viivii ore ia, te parau-tia, te haapao-maitai-raa, e te mo'araa, e te haapao-maitai-raa i te mau faaueraa atoa a te Atua.*

Te faatae atu nei te mau taeae no te Peresideniraa Mata-tamua i to ratou here, e ta ratou mau pure, ia tia i te hau o te ra'i ia vai i roto i to outou mau mafatu e to outou atoa ra mau utuafare.

Ia vai te mau haamaitairaa, tei hau atu i te maitai, a to tatou Metua i te ao ra, i nia i te mau melo atoa, i nia atoa i te mau hoa paatoa e i nia i te mau taata atoa tei hinaaro i te amui atu i roto i te imiraa i te mau ravea atoa ia haere te Misioni Tahiti i mua ra.

To outou taeae here,

David O. McKay.



NA TO'U MAU MOA I TAHITI NA.

Los Angeles, i te 10 no Tenuare 1950.

Na te mau melo no te Ekalesia a Iesu Mesia no te Feia Mo'a no te Mau Mahana Hopea Nei, e tae noa'tu i te mau hoa atoa tei tairuru mai no te oro'a tomoraa fare, Ia ora na outou na roto i te i'oa o Iesu Mesia, to tatou Fatu, amene.

Ua tairuru mai outou, i teie nei mahana, no te faatereraa i te hoê oro'a mo'a o te faaoti i te ohipa ta tatou i haamata i na matahiti e maha i mairi a'enei, oia hoi, na putuputu mai-ra outou, i roto i teie nei fare, no te haamaitairaa i te reira e no te pûpûraa'tu hoi i te reira i to tatou Metua i te ao ra, ia tia ia'na ia farii mai i te reira ei tiaraa no'na i Tahiti nei. E viro teie nei fare ei parahiraa no to'na varua, i roto i teie Missioni, ia tia ia'na ia parau, mai tei papaihia i nia a'e i te uputa rahi, i mua mai i teie nei fare pureraa: *O teie ta'u ohipa, e to'u hanahana hoi, ia faatupu i te tahuti ore e te ora mure o te taata nei.*

Ua maere te mau taata atoa no to ratou iteraa e ua tere maitai noa te ohipa i nia i taua fare ra. Te faaite nei au ia outou e, ahiri aita te Atua i tauturu ia outou, i roto i teie ohipa rahi, aita ihoa taua na fare nei i oti. Te faaite mai nei te Bibilia e, *E mea maere te mau ohipa a te Atua i te faatupuraa i ta'na mau ohipa maere rahi*, e oia mau iho â te reira. Ua maiti te Atua i na taata ite rahi, e te itoitaito hoi, no te faatereraa i teie nei ohipa, e no to raua faaoromai e te tiaturipapu-raa i te Atua, ua oti ihoa te ohipa ta'na i faataa na raua.

Na roto i to outou faaroo rahi e to outou itoitaito tuutuu ore na tae outou i te mahana ta tatou i haamana'o ma te oaoa a haamata'i tatou i teie nei ohipa. Te haamana'o nei au e, ua tia maite te Atua ia tatou paatoa i roto i te taime i faatiahia'i

teie nei na fare. Ua paruru Oia ia tatou ia ore te hoê o tatou ia roohia i te ati rahi, no reira e mea tia roa, ia tatou atoa, ia haamaitai i te Atua no te reira.

I teie nei ua oti te fare pureraa apî, e te mau ohipa atoa, te mau piha haapiiraa, te vahi no te haapaoraa i te oro'a a te Fatu, te piha putuputuraa, te piha toro'a, te piha o te mau Tuahine, te vahi no te baptizoraa e tae noa'tu i te mau ohipa atoa e ati noa'e i teie nei fare. Ua oti atoa te fare Orometua ei vahi farereiraa, na outou, i te mau Orometua ta te Atua i maiti no te tautururaa ia outou i te ohipa aroha rahi, oia hoi, te poro-haere-raa i te Evanelia mau a te Mesia, ia tupu e ia rahi hoi te Basileia o te Atua i Tahiti na.

A haapao maitai e a faaherehere-maitai-hoi i teie na fare, e i teie atoa vahi hoi, ia ore te ohipa au ore ia tupu i ô nei, ia vai noa ra te here, te aroha, te aau marû, te hamani maitai e te tiaturi-papu-raa i te Atua e tia'i, ei reira te Atua e farii mai ai ia outou, e i ta outou hoi mau ohipa, i roto i teie nei vahi mo'a, e e ite noa outou i te hau o te aau oaoa i ô nei.

Ua putuputu mai outou, i ô nei, no te tomoraa i teie nei tiaraa, ei vahi no to tatou Metua i te ao ra, tei ô nei atoa to'u varua, i pihaiho ia outou, e te mana'o nei au e, te ite nei au ia outou, ta taihoê ra, na roto i te mata o to'u aau. Ua i roa to'u aau i te oaoa i pihaiho ia outou i teie nei mahana rahi. Tera râ te tupu atoa nei to'u oto rahi no te mea ua taa ê outou ia'u nei. Ahiri ta'u e ravea na tae ihoa vau i pihaiho ia outou. Ua hinaaro noa ra vau ia haapao i te hinaaro o te Fatu, e i teie nei te rave nei au i te hoê ohipa, i ô nei, ta te Peresideniraa Matamua i faataa na'u.

Te amui nei au i ta'u mau pure i te mau pure a te mau Orometua atoa o tei rave i te ohipa i rotopu ia outou, i Tahiti na, ia haamana'o noa â te Fatu e ia horoa mai i te mau ha-

maitairaa
noa outou
na ma te

Ia ora

TE

Te tomor

I muri a'
hoi, ua ine
Tenuare i r
e na Faran
taua na ma
taata o teie
to rapae ho

Hou te m
mau motu,
roa, no Tuk

I te po'ip
i pihaiho i
taua mahar
te avatea,
Pureraa, e
e ua tomo

Ua i roa
pureraa e F
Burton, tei
ni Misioni
Papeete, te
vida O. Mc
nia i taua n
himene no
mai o Mata
te haamaita

maitairaa atoa te au ia outou, ia tupu noa outou e ia maitai noa outou i roto i te Evanelia, e ia haamana'o noa outou ia'na ma te haapao noa i ta'na ra mau faaueraa.

Ia ora na outou, i teie nei e a muri noa'tu, amene.

*Papaihia e Mittiela Peresideni
no te Misioni Tahiti, 1945-49!*

TE HAERE NEI TE EKALESIA I MUA

Te tomoraa o te Fare Pureraa e te fare Orometua api.

I muri a'e i te mau matahiti e rave rahi tei pau i te opuaraa e te feruriraa hoi, ua ineine te Fare Pureraa, e te Fare Orometua, ia tomohia i te 22 no Tenuare i mairi a'enei. Ua pau e piti matahiti i te paturaa i te reira na fare e na Farani Fulmare raua o Lelani Carver i faatere i taua ohipa ra i roto i taua na matahiti e piti ra. Ua rave itoitoe roa raua i taua ohipa ra no te mau taata o teie nei paeau moana. Oia mau, e tia i te mau taata atoa, to roto e to rapae hoi i te Ekalesia, ia haapeu no te reira.

Hou te mahana tomoraa ua rave rahi te mau melo no te Ekalesia, no te mau motu, tei tae mai i Papeete nei no taua oro'a ra, no Hikueru, no Takaroa, no Tubuai e no te tahi atu â mau motu ratou.

I te po'ipo'i o taua mahana rahi ra ua putuputu mai te huiiraatira o Tahiti i pihaiho i taua na fare ra ia tia ia ratou ia ite i te mau ohipa e ravehia i taua mahana ra. I te taeraa mai o te Tavana Rahi, i te hora hoê e te afa i te avatea, ua faataihia te Marseillaise i nia i ta hamonia rahi i roto i te fare Pureraa, e i te otiraa o taua pehe ra ua iriti atu te Tavana Rahi i te uputa e ua tomo oia i roto i te fare Pureraa ma te apeeia e te mau taata atoa.

Ua i roa te fare, e te mau vahi i fatata mai, i te taata. Ua faaterehia te pureraa e Farani Peresideni e i reira ua rahi te parau i a'ohia mai e Alama Burton, tei tauturu i roto i te haponoraa mai o te mau tauihaa, te Peresideni Misioni o Le Roy Mallory e o Raituia a Tapu, Peresideni no te Amaa i Papeete, tei tai'o mai i te hoê rata tei papaihia mai e te Peresideni ra o Davida O. McKay, e na Lelani Carver o tei parau mai i to'na mau mana'o no nia i taua na fare ra. Ua himenehia mai te tahi mau himene e te mau pupu himene no Papeete, no Takaroa e no Hikueru atoa hoi. E i reira ua orero mai o Mataio Cowley, Aposetolo, i ta'na parau e ua faaoti oia i te pure no te haamaitairaa o taua fare ra. Teie ta'na parau rahi, oia hoi, ia faaau mai-

tai te mau Feia Mo'a ia ratou iho e ia tano ratou no te haapaoraa i teie nei na fare e piti ra. Ua itehia te mana no te Varua o te Atua i taua mahana ra, e te mau taata atoa a faaotihia'i te hoê fare apî na te Fatu. Ua riro te reira oro'a ei faaoti-maitai-raa i te mau matahiti tei pau i te raveraa i te ohipa no te faatiaraa i te reira.

I muri a'e i te tomoraahia o taua na fare ra ua fariihia te mau manihini atoa, tei hinaaro, ia haere e mataitai i te Fare Orometua, e ua rave rahi to ratou tei haere e tei faahiahia i te huru hamaniraa o taua fare ra.

I roto i te hebedoma i muri iho i te oro'a tomoraa fare ra ua faatupuhia te mau putuputuraa e te oriraa, na te mau melo no te Ekalesia, e na te mau taata atoa o tei hinaaro i te haere mai. Noa'tu i te ua rahi i te reira hebedoma ua rahi roa te mau taata tei tae mai i taua mau putuputuraa ra. I te mahana piti i faatupuhia'i te oro'a tamaaraa, i raro a'e i na fare niau i ha-manihia no te reira, e ua i roa taua na fare ra no na taime e rave rahi e ua paia te mau taata atoa. I te mau pô i muri iho ua faaterehia te tahi mau haapiiraa hoho'a e te mau Amaa atoa tei tae mai no te tomoraa fare, e i te mau taime ao ua faatere-atoa-hia te tatauraa basketball e ua riro te rē i te pupu no te Amaa no Papeete tei hauti atoa'tu i te pupu o te mau Orometua. E i te pô hopea ua faaterehia te hoê oriraa popaa, tei faaterehia e te Feia Api, e ua rahi roa te mau taata tei tae mai i taua pô ra. E i te taeraa i te hopea o te hebedoma ra taa'tura i te mau taata e, ua riro mau te reira ei faaotiraa maitai no te mau ohipa tei ravehia i roto i na matahiti e piti ra.

PARAU FAAITE.

Te faaite nei te Heheuraa Apî i to'na mau hoa e, na te hoê pea, tei tupu i roto i te piha neneiraa, i faataere i te neneiraa o ta tatou ve'a.

